

**Muhyiddin Tiba Di Perlis Untuk Lawatan Kerja Sehari  
Bernama  
14 Januari, 2012**

KANGAR, 14 Jan (Bernama) -- Timbalan Perdana Menteri Tan Sri Muhyiddin Mohd Yassin tiba di Perlis hari ini untuk lawatan kerja sehari.

Ketibaan beliau yang diiringi isteri, Puan Sri Norainee Abdul Rahman dengan sebuah helikopter di pekarangan Kompleks Dewan Undangan Negeri Perlis kira-kira pukul 8.45 pagi disambut Menteri Besar Datuk Seri Dr Md Isa Sabu dan barisan kepimpinan kerajaan negeri.

Muhyiddin, yang juga Timbalan Presiden Umno, kemudiannya mengadakan perjumpaan tertutup dengan Md Isa di pejabat Menteri Besar Perlis dan kemudiannya mengadakan perjumpaan tertutup dengan kepimpinan Umno Perlis di Kompleks Dewan Undangan Negeri Perlis dan dengan kepimpinan Barisan Nasional (BN) Perlis.

Selepas itu, Timbalan Perdana Menteri dijadualkan menghadiri majlis Jamuan Rakyat 1Malaysia dan penyerahan simbolik Bantuan Rakyat 1Malaysia (BR1M) Parlimen Kangar di Dewan 2020 yang terletak di pinggir Bukit Lagi dekat sini.

Beliau dijadualkan menghadiri majlis ramah mesra bersama rakyat, penyerahan simbolik BR1M Parlimen Padang Besar di Beseri pada sebelah petang.

Pada majlis itu, beliau akan merasmikan Dewan Seri Melati, yang terletak di sebuah bangunan yang menjadi lokasi majlis ramah mesra itu.

Muhyiddin kemudiannya dijadualkan menghadiri majlis ramah mesra bersama rakyat dan penyerahan simbolik BR1M Parlimen Arau di pekarangan masjid Ibnu Taimiyah, Tambun Tulang sebelum berlepas pulang ke Kuala Lumpur.

Sementara itu, Norainee mengadakan acara berasingan sebaik tiba di sini dan dijadualkan melawat Hospital Tuanku Fauziah dan Ladang Anggur Sungai Batu Pahat.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=640019>